

егемен
Қазықстай

ОТАРБАЕВ Рахымжан

ТАҢДА ДА ЖҰБАН

Мамырдың кербез күні керіліп-созылып көкжиекке әрең сіңген. Ақ пен қызыл қапелімде қойындаса алмай айқасып жатты.

Башқұрттың жуанбалтырланып қалған бай ауылы да бүгін ерекше елегізулі еді. Саламат батыр бастаған жүзқаралы қолы Тұзтөбені кесіп өтіп, Қошалақтың қойнында жатқан қалмақ ауылын шауып, олжалы оралғалы бәтуа басы піспей тұр. Құйрығын теуіп ойнаған өңшең қылқұйрықтыны Стерлитамаққа қарай өткізіп жіберіп, із жасырған. Сойыл жеп қолға түскен үш жылқышыны жерден қазған жеті құлаш зынданға салған. Таң алдында басына жібек шапанын бүркеніп түзге отыра шықса керек, қалмақтың бір айымкөз сұлуын батыр өңгере кетіпті. Ақ бетіне шаң жұқпай, аш белі солқылдап тұрған ару қабырғаласа бере қағып әкеткен қуатты қолдың тегеуірінен, ат омырауынан ақ көбік үзген ертелі-кеш шабыстан есін жоғалтып алыпты.

Дөңгелене тігілген отау үйдің ішінде бір сәске талықсып жатып, көзін ашты. Сояудай-сояудай қамасқан кірпігін жазды да, көз жасын құс пытырадай шашып, бақырып жіберген.

Тұтқын қыздың оқыс шыққан дауысын естіген Сәдір бай алшайып қонған ақ боз үйде байыз таппай, әдетінше қызыл тілі аузына сыймай жалақтата берген. Бипаздап қымыз сапырып, көбігін шырт-шырт сындырып отырған бапты бәйбіше жекіріп тастады.

– Ындыным құрып тұр де. Жеті мүшеңе жеті қатын алайын деп пе ең?! Әукең салбырап жүріп келін-кепшіктен де ұялуды қойдың.

– Дауысы тым ащы екен, – деген бай көпшікке жантая кетіп. – Әлгі батыр неге кешікті. Қариялар қайда жүр, түге.

– Келер. Сағындыра қоймас. Осы қызыл тілің аузына сыймай жалақтап жүріп алған татар тоташыңның желігін баса алмай отырып, о, несі-ай.

– Көсеу ұзын болса қол күймейді деген сөз менен емес, шалдардан қалған.

– Соны саған арнап айтқан шығар. Қазір әлгі ақыл қосар айғыр үйір тобың жиналсын. Сол сұқсырды қатындыққа өзіме сұрап, сауғаға аламын.

Өзі де текті жерден шыққан, сарықарын тартқан бәйбішенің айбыны асып тұр.

Сәдір үнсіз күлетін дағдысымен кебеже қарнын біраз селкілдетіп басылды...

Сарала табақты еңсеріп, қымызға қанған билер батырдың қанжыға басын майлап қайтқан жорығын тағы бір мәрте қайталатып барып үнсіз қалысты. Сақалдарын саусақ көміп тараштап, жау жылқысынан олжа бөлісті, тұтқын қыздың қай шаңыраққа бәлекейлігін, зынданда жатқан үш қалмаққа айтылар кесімді ойша қуады.

– Ал, ағайын, ойда орыс, қырда қазақ, құба жонда қалмақтың қай-қайсысы болмасын башқұртқа іш тартып отырғаны шамалы, – деп тоқбасар сәтте сөз тізгінін алдымен Дәулет би ұстады. – Баяғыда бір қарғаны атып алып қора басына байлап қойсаң, өңгесі безіп кететін. Заман аунады. Ондай тәсілге жау тұрмақ жаман көршің де қашпауға айналды.

– Шекерің аузыңда, – деп Сәдір бай бір көтеріліп басылды.

– Айтсам, ендігі жерде айналанды алаңсыз шолмай, құйрығыңды күлге көміп отырып, билік айтудың күні кетіп бара ма деймін, – деп бір тоқтады.

Манадан бері жан-жағынан жауған қошаметке шомылып отырған Саламат қана “бәрекелді!” деп қалғанымен, оны қоштар жан табылмады.

Сөз иесіне осы нені көңірсіткелі отыр дегендей аларып, сазарып қараған билер мен ақсақал, көксақалдардың мойын тамырлары қапелімде ұйқысынан оянған жыландай көкбілеуленіп қозғалып кетті.

– Апырым-ай, Дәулетжан-ай, Үпіге барып әлгі оқып-шоқыған ініңнің үйінен ағаш орындықты ерттеп мініп, шай ішіп келсең болды, ләмің бұзылып жүре береді. Ауылда қалған біз пақырды аясаң нетті, – деп шаяндай шақпа тілді бір қария мына сөзді жүк көріп, әжептәуір ауырлап қалды.

– Дәуке, лебіңізді үзбеңіз, – деп батыр бұ жолы да қолтықтай кетті.

Сәдір бай аузына сыймай отырған қызыл тілін жалақтатып, құрметін көріп отырған қарияларға жалғыздап көз тікті.

– Ендеше турасына көшейін. Баяғыдан орыстың отын көсеп келген қалмақ енді араздасып, алты айшылық атақүлдігіне аттанғалы жатыр деседі. Жолшыбай ежелгі жауым башқұрт ауылын бір шауып, қанқақсатып кетемін депті. Орыс Нұралы ханға әскер жинатып, қашқан жауынды ізінен қалмай талқандап бақ деп пәрмен беріпті. Төменгі қазақ та жыланның тіліндей екі айыр ғой. Әлгі Сырым батыры мен Қаратау биі бөлек қол жинап, ханы мен қалмаққа қатар соғыс ашамын деп қарашасына қару соқтырып апынып-күпініп ол жатыр дейді.

Мына сөзді естіген башқұрттар алшайып қонған ақбоз үйдің кереге көзінен тосын ызғар ескендей тіксініп қалды.

– Ой-бой, не дейд?!

– Үркіншілік басталыпты ғой.

– Үркітіп өлтіретін болды-ау, – десіп ұзынды-қысқалы ғып созып отырған аяқтарын жинап ала қойысты.

– Қалмақты есіртіп, орыспен орталарына от тастап отырған Орта жүздің Абылай ханы деседі.

– Шонай да көшемін деп пе?

– Жоқ, Шонай мен Үбіші ұстасып, бір-біріне “бетің құрсын, кәпір!” десіп кетіпті.

Шонай Ақ Еділдің арғы бетінен қоныс сұрап, ақ патшадан мейірім тілеп жатыр дейд.

– О-о-ш-ш! – деп көзін бағжаңдатқан бір қызыл иек шалдың айтайын деген сөзі ысқырық боп шығып басылды.

Манадан бері өз ортасында мойны озық отырған Дәулет би әр көкірекке бір аласүрең ой тастап өтті.

– Осының бәрі әлгі орыстың оңтайына жүріп оқыған інімізден шығып жатқан сөз болды ғой.

– Е, оқыған соң білмей қайтсін.

– Қыр асып келсе, кеңес құратын біз дейсің бе, – десіп алқақотан отырғандар теңселісіп кетті.

Іргелес жатқан қазақпен бір күн тату, бір күн қату боп отырған жайымыз бар. Орыстың да оң қолын беріп тұрғаны шамалы. Қалмақ қағынып тиіссе, қалай қарай қисаяр. “Жау шапты!” деген алақүлік айқай шыққанда ғана әскер жинап, онда да ішім-жемін көпсініп жазда жинаған қолды күзде таратып жіберетін бұлар қамсыз қап, қапы соқпай ма?– деген ой әрбірінің кеудесін күйдіріп жатты.

Оңайынан келген олжаны құл мен аруды бөліске салар, қыздырма сөздің қызуына тояттап тоқбасар сәттің көзапара үркіп кеткеніне іштей наразы Сәдір бай ғана аузына симаған қызыл тілін жалақтата берді.

Ортаға ақыл тастап біраз ырғасқан игі-жақсылар ой мен қырға ат шаптырып, дереу әскер жиюды Саламатқа аманат етті. Олжаға түскен малдың әзірге үйірін бөлмей алғашқы қара суық ұрып, бозқырау түскенше қалың қарағайлы орманның маңына байырқатып ұстайық десті. Осымен іс тәмам деп бата жасауға келгенде: – Үш қалмақты қайтеміз? Оларды бостан босқа бағамын ба? – деп манадан бері үнсіз мақұлмен отырған Сәдір бай тұтқындарды тап бір жал-жаямен асырап отырғандай саңқылдап кетті. – Қыздың дауысы құлағыңды тесіп барады.

Бапты бәйбіше жұп-жұмыр ақ білегін кербез көтеріп, қымыздың ашуын жазып, үсті-үстіне сапырып, төрден бастап үлестіріп шықты.

– Кесімді сөз өздеріңізде.

Батырдың олжа бөліске келгенде қайрат иесі өзім деп өңмендемей, жолды жасы үлкендерге жолдағанына өзгелер кәдімгідей риза болысқан.

– Дәулетжан не дер? – дегенді манағы шаяндай шақпа тілді қария енді анық жуасып айтты.

– Алдымызға тізерлетіп әкелсін, көрейік.

– Жасын, шама-шарқын білейік.

– Көрмеге қойғандай ғып қайтеміз. Осы жерден кесім айтайық.

– О баста көрдік қой, кәпірінді, – десіп аз-кем қауқылдасқан топ ақыры тұтқындардың орта жастағы еңгезердей зорын байлап-матап, Үпідегі орыс жандаралының кеңсесіне табыс етейік. Орыс жатақтарына қастандық қылғалы жүрген жерінен ұстадық дерміз. Арғы жағын оқып-шоқыған ініміз келістіріп жалғап әкетер. Сөйтіп, мынау алмағайып кезде олардың да бір ықыласын алып қояйық, – десті жортақшыл билер.

– Біреуінің көзі шақпақ тастай жылтылдап тұр, өжет, – деді зындан күзетіне жауапты жігіт. – Қыста кіре тартуға таптырмайды.

– Құлағын кес те, өгіз мінгізіп, сиырдың соңына сал. Әспеттейтін кез емес.

– Тұтас кесейін бе?

Табалдырық жанында отырған жігіт алақанына бір түкіріп қойды.

– Бір құлағын. Тек ырым ет. Асып жейін деп пе ең, нәлеті.

Сәдір байдың мына сөзіне таң атқалы тоң-торыс жүрген бапты бәйбіше де мырс етіп күліп жіберді. Үй ішін бір жаймашуақ еркіндік, жылылық жайлап жүре берді. Кірпігі желімделіп отырған құс ұйқылы қариялардың өзі қутың қағып тыңайып кетті.

– Үшіншісі бір шикіөкпе бозбала. Нағыз қалмақтай қарасұр емес, бидай өнді. Кейде өксік қысып, өкіріп жылайды.

– Алдымызға әкелсін, – десті бәрі елеңдесіп. – Қалмақта кіріптарлықта жүрген мұсылман баласы болмасын.

Ұзын бойлы, сыптығыр, енді тебіндеген балапан мұртты бозбала табалдырықтан бермен аттады да, сылқ етіп отыра кетті. Қыр мұрынды әдемі жүзінде үрей мен үміт кезек шарпысады. Бәйбіше “жазған бала” деп күбір етті де, шараяқ толы қымызды ұстата салды.

– Іш.

Үй толы үлкендерге үркек қарап, бас шайқады.

– Әкең кім?

– Қалмақ.

– Шешең?

– Табын.

Мұны естіген қариялар желді күнгі қарағай басындай теңселіп, бір дүркіреп басылды.

Табын руының ту ұстары өзім деп әншейінде төскейлеп бағатын Сәдір бай қызыл тілін тынымсыз жалақтатып:

– Қай Табын? Башқұрт па, қазақ па? Қай Табын? – деп отырған орнын опыр-топыр етіп жіберді.

– Табынның қыздары бай таңдап жата ма? Тиген де. Жездем оңай жерден жиен тапты, – деп бір балдызы сықылық атып жатты.

– Білмеймін. Әкем жорықта қаза тапқан. Шешем құсадан өлді. Қалмаққа пәнде болма. Нағашыларыңды тап. Жайық бойынан ізде, – деген.

Бозбаланың жүзі әлемтапырық боп бұзылып, көзі боталап қоя берді.

– Шешең Табын болса қаңғыртып қоя алмаспын. Бала етіп алам, – деп кеңқолтық Сәдір бай тағы бір көтеріліп басылды. – Кәне, бата қылыңдар.

– Бата жасамас бұрын баяғы шалдардан қалған жоралғы бар еді ғой. Байеке, алдымен сол ырымды жасайық. Бала да, бата да сонан соң ешқайда қашпас, – деп бір қария екі айыр сақалының басын қосып уыстап мәміле түйді.

– Уай, бәйбіше, көтер бұтыңды, өткіз баланы астынан. Қырғын қыздың ортасындағы жалғыз ұлға серік табылды.

Алкеуделеу байекең айналасын айран-асыр, маз-мейрам ғып, аң-таң боп отырған тұтқынды жетелеп бәйбішесінің жанына келді. – Бісіміллә де. Ал, кәне...

– Қой жазған, өңшең қайнағалардың көзінше... Осы сенің ұшпа жүректігің-ай!

– Шырағым, жаттан жақын болған таптырмас деген. Сәкең ыңғай көрсе, ерсілігі жоқ қой. Аталардан қалған жол ғой. Іргеге қарап ырымын жасай бер, – десіп өңшең аузы дуалы ақсақалдар жүзін кереге тұсқа бұра берді.

Өзінің етегі қанамай, байы тоқалға тоқтамай зәрезап боп біткен бәйбіше тұтқынға мейірлене қарап “Келе ғой, ұлым” деп маңдайынан мақтадай жұмсақ алақанын жүгірте сипап, іргеге қарап созған оң аяғын сәл көтерді де, баланы еңбектетіп өткізе салды.

– Бәйбіше, ұлды болдың!

– Ұзағынан сүйіндірсін!

– Аты Табылған болсын!

– Жұрт балшықтан бала жасай алмай жүргенде...

– Аллекем шаңырақтан бере салды, – десіп өңшең би бата қылысты.

– Алла риза болсын, – деді бәйбіше ерекше толқып. Жүзіне алау шауып, көзінен екі тамшы жас еріп түсті.

– Табылғанға қалың беріп, қатын әперем. Енші бөліп берем, – деп Сәдірдің отырған орнына құйрығы сыймай дөңбекшіп кетті. – Қара қой әкеліндер. Қалжасына сойыңдар.

– Ал, биекелер, сіздерден бір өтінішім бар, – деді бәйбіше байсал тартып.

– Айт, келін.

– Айтсам, мал арыстанның аузында деген. Саламат қайным ат жалдап мінгелі елге пана боп, ылғи жаудың өтінде, жардың шетінде келеді. Олжасы әр қазанға ортақ. Анау отау үйде жатқан қалмақ қызын осы қайныма еншілейік. Келіншегі жіңішке аурумен шікірттеніп жүрген. Екі жарты бір бүтін болсын.

– Әп, бәрекелді! Ойлағанымыз да осы еді, – десіп ырғасқан әңгімеден оңай құтылған қариялар тездетіп бет сипасты. – Екі той бір келді.

Сәдір бай жан-жағына қарағыштай берді.

* * *

Наурыздың ақша қары ғой бұл, жарықтық, аспан жақ тағы да гүлдей бастады.

Бұлт пен буалдыр мұнардан жүзін аршып ала алмаған күннің қай тұста теңселіп тұрғаны беймәлім. Аспан астын қыдырып, қонар ұясына әдеттегідей титықтап жығылар. Әр жерде ұйысып қалмай, тұтас жайылған бозшуланда желбегейдің денесін күсеттендіретіндей ызғар бар. Қар да сабалап жаумағанмен, қисық табан етіктің тақасын көмкермей басылмас. Буынын жел кернетіп, әр жерден шоқ-шоқ боп қарауытып тұрған қияқ пен ақселеудің түбі қоржындана бастапты. Таң құланиектенісімен қыстан жіңішкеріп, арып шыққан сыңар аяқ сорапты қоймай қуалап келе жатқан жалғыз атты суыт жүргінші ғана ыңғайтөкпе жүрістен жаңылар емес. Түс әлеті осы-ау, деп қоржын басына бірер мәрте қол сұғып, жеңдібілектей сұр қазы мен саумал құйылған торсықты алған. Онда да тізгін тартып әуре боп жатпады. Шөл басып, мұртының екі шалғайына жұққан ақты алақан қырымен жатқыза сылап тастап, жақ жырта есінеп, есіне әлдене түскендей “Әй, Алла, жолымды өзің оңғар” – деп сапар сәтін Жаратқан иесіне міндеттеп қойды. Таң асып шыққан тоқжарау торының өзге аттың желісіне қимас сылт аяңын азсынып, иесі сауырға анық батырмағанымен төрт өрме қамшыны сып еткізіп өтеді. Бусанып, қолтығы кеңіген торы да наурыздың ақша қары көмкеріп, көзтаса бола бастаған сораптан айнымай, оң қолдағы қарауытқан мешел төбешікке қиялай салды.

Төбешік болса басына тіккен үш-төрт түп жыңғылды ес көріп, құлақкесті мына дүниеге едірейісіп қарайды. Жыңғылдың жалаңаш бұтағына жармасып, қанатын қымтай қаусырған жалғыз қара қарға отыр. Екі езуінен төмен құлап шөгіп қалған қара мұртты, қара сұр, қатқыл жүз, қапсағай жүргіншіні көргенімен, қанатын қомдап қоюға жарамады. Тек бірер мәрте қарқылдап тынды.

– Ақ шақыр!

Түлкі тымақты баса киіп алған қара сұр, қатқыл жүз. Е, мына пақырдың да тамағын суық ұстапты. Дауысы шықпайды. Отыр солай, өзіне де сол керек, ендеше, – деп қаралай нығызданып қойды.

Сыз бүріккен дүниеге қараңғылық бойлап еніп, жер бетіне шөге бастағанда, ықта-сынсыз жетім қыстауға кеп тізгін тартты. Бітеуді жас төлге беріп шыққан ірі қара ашық қорада жусайды. Үй жанынан төбет дауыс көтерді. Ақ жаулықты жеңгесі қора айналып түзге отыра қалған екен, ат үркетін жерден ербиіп ерсі көтерілді.

– Тақымым қажалып бос қайттым де. О, жазған. Білгем... Үйінің тұсынан аш иттің өзі жүгіріп өтетін Жеңсікбайдан шөп сұрап қай иманың тасып барады, қырдағы екі-үш шөмелесін артып ала сал, дедім... Ой-бай, қартайғанда сақалымды саудаға қайтіп салам деп... Күннің түрі мынау, тірілей талап жейін деп тұрған мал анау. Немді берем. Қырып барады...

– Ым... қық... уһ!

Жүргінші солқ еткізіп көлігінен түсті.

Мына үнсіздік жеңгесінің қазан қайнатар ашуына қаралай тамызық тастап жібергендей-ді.

– Жас сорпа аңсап біттік. Қарашада жыққан малдың қызылы қашанға жетеді. Сой, дедім қысыр қалған тұсақтың бірін... Төркініңнен айдап келген малың бар ма деп...

– Ә, солай ма? – Жүргінші төрт өрме қамшысын үйірді.

– Құдая, көтек, мынауы кім?

Төрт өрме ақ жаулықтың жонарқасын жанай өтіп, ақ қағазға тиген қайшыдай қар бетін тіліп жіберді. Ысылдаған қамшы дауысынан тоқжарау торының шаңырақтай сауырына ілесіп жеңгесінің де жауырыны безгек қысқандай билеп кетті.

– Алла-ау, не жаздым? Кімсің, қайдан жүрген жансың? – Аузындағы сөзі іріп түсті.

– Бар, сүрінді сал да қазан көтер! Қора басында жөн сұрасып құдаласқалы тұрған жоқ шығарсың.

Ала төбет пен ақ жаулықты қыстау есігінен жарысып аттады.

Аулақтан түйе бақырды. Жұмсақ қарда сырғыған шананың сырылы естілді. Жүргінші тоқжарау торының шап айылын босатып, ауыздығын алып, бітеу қораның ықтасынына байлады. Ұзақты күн ат үстінде бойы тоңазып, ұршық басы ұйып қалыпты. Милықтап кеткен түлкі тымағын қолына алып, қысқа қиылған қайратты шашын жапыра бір сипап өтті.

– Ой, жайрағыр, – деген кейісті дауыс естілді. Жайберген ағасы шөмеле жығып, шөп алып келе жатқан болды. Шықылықтаған шаруасы бар немере туыс-ты. Қашты-қудыға қақ-соғы жоқ момын. Бәйбішесінің жылы өткен соң асау үйретемін деп жүріп жалғыз ұлы мертіккен. Сегізкөзі сынып, мешел боп, есік пен төрдің ортасында құйрықпен жорғалап қалған. Жатырына тартып туған әдеміше, шашын маңдайдан қақ айырып өрген жалқы қызы бар-ды. Басқұншақтың сорында тұз аударған бір жатақтың шаңырағына келін боп түсті деп есітті.

– Қалың малына келелі түйені айдап беремін деп Дәуіт тоқалдыққа сұрап тыраштанған екен. Қыс – соғымы, жаз – жайлау қызығы ортақ, байдан ылғи да көлеңке дәмепіп қалған ағасы Дәуіттен несібесін үзгісі жоқ, қайдан шалқайсын. Әрі бойы таралып қалған қарғасы баданадай бауырсақты омырып, тортасын айырған сары майды томырып иен байлыққа күрп ете түссе, кәне. Құдайдың тірілей қарасқаны. Бірақ шайтан азғырайын десе киюын келтірер.

– Дамбалының ауы саржалақ боп ығынан өткенде ылғи да кәрлен текенің иісі бұрқырап қоя береді. Сөйлеген сайын имек мұрны аузына жүгіріп байыз таппайды. Есіней қалса қып-қызыл боп көмекейі көрінеді, сұмпайының. Мұндай байдың қойнында қалтырап жатқанша, құлдың құшағында құтырып жат, көзжақсым, – деп ноғайшалыс бір қатын килігіпті. Әлгі сөзден кейін етегіне шөп ілінбеген бойжеткен тұрмақ, қырық жыл төсектес болған иіссінді бәйбішесінің өзі жеріп, борбайлап қашып шығар. Жетім қызға

жеңге көп, ақыры сор жағалаған тұзды ауылдан дәм бұйырған. Тесік моншаққа сынық ине табылмай қалмас, тек бағы ашылса болғаны да...

Иманы бұйырмағыр қатындардың өсегін ойша қуалап кеткеніне іштей күпірлік айтқан жүргінші тағы бір “Өй, жайрағырды” – дәл жанынан естігенде селк етіп бойын жиып алды. Қар аяғы сұйылып, буалдыр мұнар сейіліпті...

— Ассалау-мағалей-көм.

— Дауысыңнан садаға кетейін, Қосаяқжан-ай, алты жылдан бері ағаңның амандығын бір білмей, қайтіп шыдадың... Жанаяр жауыр атанның бақырғаны мен Жайбергеннің дауысы әлемтапырық боп жарысып шықты. – Жалғыз інің жер таянып қалмаса, бақсының моласындай шошайып елден жырақ отырар ма ем? Руымыз ұранға шыққанда “көппен көрген ұлы той” деп ортасында ойқастап жүрмес пе ек. Сырым менен Қаратаудан жаны ардақты дейсің бе? Жауыр атан, жаман қатынмен жағаласу үшін туды дейсің бе?

Үнемі біреу төбесінен кертұқыл алатындай тұқшың қағып жүретін момын жан әбден шерленіп қалған екен. Қосаяқты құрықтай иіп әкеліп, басын бауырына басқан қалпы қапелімде босатар болмады...

* * *

Аспанның ажарын алған алашұбар бұлт не үдере көшпей, не бір жерге ұйымай тұрып алды. Құбыладан ескен қоңыр салқын жел қарсінді құмақ топырақты кеберсітіп тастағанымен, шуақтың уызына жарымаған көк әлі еркін бой көтеріп кете алмай тұр. Қыстан қымтырылып, қол-аяғы буылып шыққан бала-шаға ғана сиырдың өлі жүнінен домалатып алған доптың қызығына түскен. Қашты-қуды жасап өзара кезектесіп ойнайды. Көз ашқалы көргені атыс-шабыс, дүрбелең болса, басқа нені ермек етсін, бұ шіркіндер, деп іштей тұжырым айтты Сырым.

Сәскеде қыр басына шыққан. Бойын суық ала бастаған соң желбегей шапанының белін қынай буды. Кездігінің қынын түзеді. Ала қыстай бойын билеген бір шамырқанудан арыла алмай-ақ қойсын. Айналаңдағы жұрттың өзі мынау төбенде қалқып тұрып алған алашұбар бұлттай боп не ажары, не базары жоқ болса, бұл қайтып төсегінде тыныш жатсын. Ақтүтек ақпанмен арпалысып барып, Жыңғылдың ойында қыстаған Қаратаумен ғана кеңес құрған. Онда да екі тізгін, бір шылбырдан басқа билігі жоқ би атаулыны, алдына ағаш сап найза өңгерсе екі қызылдың арасын дүрліктіріп бітетін батырсымақ біреулерді жолатпай, жүзбе-жүз жатып бәтуа айтысқан. Бәтуаның түйіні, наурыз туысымен он екі ата Байұлына аузынан дуа қашпаған он екі ұраншы жіберу керек, қарашаны көтерсін, қару-жарағын, ат-әбзелін сайласын, ұзақ жортуыл тұр, қоржындарын майласын, бірақ кімге қарсы көтерілетінімізді бұ жолы жария етпесін, ойда – орыс, қырда хан, Еділ бетте қалмақ тұр, тұщы етіңе тұмсық сұқса қай-қайсы да аш бөрідей жай қоймас, босмойын күн кешіп жан сақтаймын, жортақтап қашып, жорғалап бұғып шағыл ауыстырып қонам дегендер болса ырқы, алайда ертеңгі күні қара дауыл қарсы көтерілгенде табан астында жаншылып қалдым демесін, айқай көтерілген жерде араша аз, ұран көтерілген жерде ұрда жық молға, сайды. Ел жайлауға көшіп-қонған мамырдың орта шенінде, бұйырса аттаныс басталар. Ысық-шеркеш, адай-таз, қызылқұрт-масқар, кердері-жаппас ауылдарын аралап қайтқандардың уәжі дәтке қуат дегізердей.

Қолға мынау деп ұстар нәтижесі болмаса да, он жылға таяу дүрбелеңде ел-жұрт ерқашты боп қажымапты, қайта “Сырым – бастаған, Қаратау – қостаған қай қырғыннан тартынып ек, әлдекімге иық көрсетсе, сес білдірсе, жақынына емес жатына, жамағатына емес жауына көрсетіп жүр. Біздей жаман-жәутікті қатарға қосам деп арпалысады. Әйтпесе, бірі – батыр, бірі – би, тақ пен бақтан, байлықтан кемдік көріп, кенже соғып жүрмеген шығар. Өлсек бір молада, тірі қалсақ бір төбенің басында қонармыз”, десіпті. Нұралының қолынан сыбаға асаған ағайынның бұра тартып, бұлтқа салғаны да жоқ емес көрінеді. Олардың ындыны Сырымға ежелден мәлім. Итжығыс түсіп жүрген хан мен батырдың қайсысы бел ала бастаса, соның ықтасынына тығылып, ығына жығылып бас бағатын кәнігі қулық. Ендігі жерде кім-кімге де батпа-шықпа ол әдісі өте қоймас. Ал,

ғұмыры асау үйретіп, ат жалын тартып мінбеген, мешкей өгізінің кебеже қарны бұттарын талтайтып жіберген дүбәра қосты кей қарашаға тіпті өкпе жоқ. Үш бұтақты айырынан басқа қаруы, тары бөрттіріп, талқан жеген шибұт бала-бақырасынан басқа дәруі, қалың малы бір қашар, күлді-көміш тесік моншағынан басқа зәруі бар дейсің бе, о жазғандардың. Ханның қарашасы атана ма, қалмақтың жалшысы бола ма, бәрібір шығар. Тіпті тұзға түскендер орыс жегіндіге алса, күймей піскен ақ бөлкесіне тоямыз деп насаттанады деседі. Жарайды, жаудың бетін ықтырып мұның өзі елге бас иелік етсін. Сонда әлгі өгіз мінген өлмешіні қай шапағатына бөлеп, қай мұратына жеткізер еді?.. Жалаңаш қабырғасына пияз қабығындай шыр жұқпаған соң оларға кімнің тазкепесін кисін, айырмасы кәне? Атасы басқа кәпірдің азабынан, ақсүйек біткеннің тозағынан құтқарам, бостан боласың дер. Қол-аяғын бос қойсаң, құдыққа құлап өлер құл бостандықтың қадірін біле ме? Сауып ішер сүті жоқ, сойып жейтін еті жоқ, ол неткен бостандық деп таңырқар. Жә... жә... Бір-біріне жалғанбай үзік-үзік боп ойнаған сағым сынды келер күн Сырымға ақ жарылып сыр аша қоймады.

Қысыр қалған енесін арда емген құла тайды жетекке алған екі жылқышысы үйірден жырылып шығып, бері беттеді. Қыс боранды болғанымен, соңын сақылдаған саршұнақ аязға ұрындырмай жылқыға тебін беріп шыққан. Қара өзеннің баланың білегіндей үкілі бас нар қамысы таптырмас пана. Қалыңдықтың ара-арасындағы ойдым-ойдым алаңқайға өскен, өрт пен шалғыдан ада тебінгі қағар өлеңшөп өзекті малды аш қоймас. Осы жырынды екі жылқышысы айтып келген. “Тай мен жабағының жылы-жұмсағына дөнігіп алған қасқыр қамыс сығалап күн беруді қойған соң, арланын ерулі атты алмастырып қуып, соғып алдық. Нағыз көкжалдың өзі екен, ұрғанда үзеңгінің темірін тістеп алып тартысып, қайысын қолымыздан жұлып әкете жаздады. Мұндай сойқанды кім көрген. Екеулеп көтеріп атқа өңгере алмадық. Терісін аязға қатырып, керіскедей ғып бөрі соқпақтың жолына іліп қоюымыз мұң екен, ұлардай шулаған қаншығы бөлтірік біткенді ертіп, қарасын батырды. Арланның ажалын көріп арттарын қысқан-дағы. Көзіміз ашылды” – деп.

Таптырмас тәсіл екен, деп түйген іштей Сырым. Бекіспес жаулыққа көшкен соң аңы не, адамы не? Кім ашулы қолға бұрын түссе, соның топ бастар көсемін, сөз бастар шешенін.... Әне, сонда ғана көзі майланып алған есірік немелердің өңгесі кірер інін таппай қалар.

– Қонақтардың қырдан құлайтын уақыты жеткен сынды. Батаны Қаратаудан сұраңдар. Ауыл-аймақтың түтін андыған бәтуасыз біреуі сақалын бұлдап киіп кетіп жүрмесін, – деп батыр жанына бір қырындап келген жылқышысына тіл қатты.

– Асшы жігіттерге айт, қысырақтың қымызына сарала сүр қазы мен мейіз салып піссін. Ашуы қатты еді, жұмсарсын, білек күштен кемдік көрсетпесін. Жөнел!

Аяқ жетер жердегі ел-жұрт батырға қайыра сұрақ беріп не сөзін кимелеп жатпайтын ежелгі дағдысы. Нағыз бір билік қысып бара жатса, жанындағы кісіге естірткен боп уәж түсіреді. Бата берді дейтін Алдар би мен Малайсары, үзеңгі жолдас, қара сөзден қаймақ алған Қаратау би болмаса, бұ күнде Сырыммен шендесер исі Кіші жүзде пенде баласы қалды дейсің бе? Ызғындай өріп жүрген төре-төлеңгіт түгілі, хан әулетінің өзі иіс алмас жаман дейтін Даттан туған кәтепті қара нардың қабағын таба алмай, қыбын баға алмай діңкеледі емес пе...

Сәуір сызы тарар емес. Алашұбар бұлт аспанды әлі алдарқатып жүр. Батыр өкше көтере түсіп батысқа назар тіккен. Көз аясына сияр жерден бес-алты аттылы көрінді. Көк жорғаның өзге аттан мойны озық келеді. Шіркіннің омырауы есіктей боп шайқалып келе жатқанын қарашы. Күмісқас ердің үстінде қаққан қазықтай боп шаншылып Қарекеннің отырысының өзі бір дүние. Дауға түссе қырандай, жауға түссе ұрандай болған бекзатым-ай, деп әлгі бір үзіп-қашпа ойлар жүдетіп тастаған Сырым мына көрініске қаралай сүйсінді. Бұрын бұл бауырын жазып шабатын жүйрік неге мінбейсің дейтін-ді. Бақса, биге жортаққа түспейтін жорға жарасымды екен-ау.